

## STURMIUS HOTOMANNO

Cum tua tibi Professio non videretur sa-  
 tis honorifica, & Doctor Balduinus  
 anteferretur propter Professionem Ju-  
 ris; à Balduino Doctore impetrasti, ut pro ipso  
 aliquando doceres. Non invitus ille id tibi con-  
 cessit, neque quidquam minus metuebat, quam ut  
 tu illius insidiareris aliquando vel fortunæ, vel  
 existimationi. Sed tu subito & Duarenum con-  
 tra eum concitasti; & Balduinum apud me accu-  
 sasti, & non apertâ, sed occultâ criminatione;  
 cum dicebas, ut mibi ab eo caverem; nihil ei clau-  
 sum esse; observare omnes Tabellariorum: Adversa-  
 rium eum esse Doctori Duarenio, doctissimo Viro,  
 & Religionis nostræ Studiosissimo; inimicum verò  
 esse Calvini. Hac tu accusatione effecisti, ut ego  
 alienarer à Balduino, & propter me alii etiam  
 ab illius abstinerent familiaritate; usque adeò ut  
 Balduinus Heidelbergæ, quam nobiscum esse ma-  
 luerit, & ibi à PRINCIPE, & schola stipen-  
 dium acceperit. Atque hic etiam, quid veri in  
 alterâ parte fuerit, facile appareat. Falsum enim  
 erat, quod de Duarenio dicebas: nam moriturus  
 contra Religionem nostram, pro PONTIFICIA  
 est testificatus. Balduinus innocens omnino; nisi  
 abs te in tenebris accusatus esset, comparatis per  
 te literis accusatricibus, sparsis etiam per te cri-  
 minibus: quibus calumniis bono PRINCIPE  
 abute-

abuterevis contra Innocentes. Sed suo tempore  
omnia revelabuntur, quæ nunc sunt abscondita.  
Sed tamen ne tunc quidem observabam tuas insi-  
nuationes, & tuorum consiliorum exitus, & post-  
quam Balduinus à nobis Heidelbergam discessit,  
& antequam discessit. Cùm constaret autem,  
eum discessurum, in illius postulasti locum succe-  
dere; & per me illud procurabas, & ego impe-  
travi, tacitè non nullis improbantibus, qui tuam  
simulatam simplicitatem observabant diligentius.  
Impetrâsti tamen; & quâ methodo antè aliquando  
apud me usus eras, eâdem etiam eo tempore ute-  
baris: & dicebas, turpe esse, in Balduini locum  
succedere laborum, & non stipendii &c.

Hæc ab ipso, ipso STURMIO vestro, scripta,  
& evulgata esse, cùm scias, & scias quoque esse  
verissima, & ab omnibus legi eâdem fide, non  
ignores; nunc quo ore declamas, quâ manu  
scribis, ab hoc HOTOMANNO Argentinæ BAL-  
DUINUM convictum esse sceleris? Re&tè tamen  
addis, nescio cuius: Sciebas enim, nullum  
fuisse: Sciebas verò, cuius ipse HOTOMANNUS  
convictus, dam natûisque sit. Neque enim verò  
tua impudentia contenta est hâc unâ sceleratâ  
calumniâ. Passim etiam scribis, BALDUINUM  
modò Argentinâ esse ejectum; modo ab Argen-  
tinæsisbus aufugisse. Velles enim persuadere,  
eum illinc discessisse, ut tu ex Galliâ, vel etiam  
ex tuâ Lausaniâ. Sed nihil agis, ô bone! BAL-  
DUINUS cùm Argentinæ, inter peregrinos, qui-

bus clām leges dabatis, eas per vos excitatas esse turbas, quæ illic deinde perpetuæ fuerunt, & Vestros illic esse, quales sunt istic, intelligeret, lubenter audivit evocari se ab Optimo Principe FRIDERICO SENIORE PALATINO ad Heidelbergensem Academiam, hoc est, ad Juris Scholam celebriorem, & vitam tranquilliores: Ut simul tuo illi fraterculo, jam pridem hianti, & famelico ultrò cederet, quod miser Candidatus tot jam mensibus anhelans, frustra ambierat. Extant literæ PALATINI ELECTORIS ad Senatum Argentinensem, honorificâ rogatione BALDUINUM requirentis: Extant & ejus Senatûs ad PALATINUM, honestissimè dimittentis BALDUINUM cum præclaro elogio; quid igitur laboras, ut aliud persuadeas?

Te te, tametsi frustra id faciam, Thedore, per tuam, si minùs ingeneratam, at certè regeneratam ingenuitatem obrestor, si qua in te conscientia, si qua frons est, quâ vel conscientiâ, vel fronte agis, ut agis? Nam neque hic locus est, in quo dicas, Poëtis mentiri licere, quibus quidlibet audendi potestas data sit. De totâ BALDUINI vitâ, & professione Argentinensi, quæ unius fortè anni fuit, cùm non modò res ipsa, & Civitas tota præclarè testificetur, sed & Clarissimi Auditores totâ Europâ sparsi (è quibus nunc unum, honoris causâ, nominabo PRINCIPEM NASSOVUM, qui  
nuper

nuper BALDUINUM in Belgicâ tam est amicè complexus) quid, BEZA, tua misera invidia & se, & te frustra torquet, ut illius temporis laudem, gloriámque imminuat, & Solis lumenibus officiat?

Et verò sentiens, aliud, quod latrando arrodas, alibi quærendum esse, BALDUINUM, vos fugientem, Heidelbergam usque persequeris. Sed investiga curiosè singula; quid tandem proficies? In illâ Germaniæ Academiâ Palatinâ BALDUINUS Jus Civile docuit propè quinque annis, & ita docuit, ut, si Maledicentia in hoc quoque genere tua sit retundenda, non modò doctissimi Auditores insurgent; sed ipsi, ipsi, qui Scholam circumstant, montes, ipsi parietes Auditorii, etiamnum Doctorem illum suum requirentis, clamabunt te esse, quod es, hoc est, omnium Hominum, (non occurrit nunc verbum te dignius) nequissimum. Cùm primùm eo BALDUINUS veniret, scis, quām florentem invenerit eam Scholam? Invenit virescentem: Nam & ipsum, quo ad Auditorium ibatur, iter tam erat tritum, ut musco tectum esset, non minùs quām Auditorii subsellia enatis graminibus constrata. Tanta solitudo, tantus situs, squalor tantus erat: Credo, quòd paulò antè pestis urbem afflixisset: tam tristis tamen facies BALDUINUM minimè deterruit. Sed nec reliquæ difficultates multæ, & graves, quæ molientem, quod

moliebatur Jurisprudentiæ causa, circumsta-  
bant, eum debilitatum perculerunt. Quid  
affiduo tandem labore, & diligentia effecerit,  
ex re ipsa judicium fiat. Tu, qui in rem præ-  
sentem saepius eò profectus es, & meliorem  
doctiorémque Scholam Juris, Antecessore BAL-  
DUINO, quam velles, etiam invitus vidisti,  
quid frustra reclamas? Ipsi etiam, ipsi Com-  
mentarii, qui eo tempore editi sunt, & abs  
Studioſis etiamnum leguntur, idonei sunt testes  
ad refellendam tuam obrectationem. Et verò  
ea prospiciens BALDUINUS, suorum studio-  
rum, laborumque monumenta, quæ obruere  
non posses, relinquere voluit. Et quamvis  
præter Ordinariam Juris Professionem, ultrò  
alteram Historiæ Universæ Prælectionem sus-  
cepit, tamen eodem tempore Studioſis etiam  
scribendo prodesse conabatur. Quid igitur  
tunc & ageret, & doceret, saltem ex libris,  
quos illic emisit, discito. Tituli eorum sunt,  
si fortè requiris.

*Catechesis Juris Civilis.*

*De Legibus XII. Tabularum.*

*De Pignoribus, & Hypothecis.*

*De Conditionibus.*

*Ad Paulum de Divisione Stipulationum.*

*Ad Eundem de Cautione, lecta in Au-  
ditorio Papiniani.*

*Ad Papinianum de Evictione, & Dupla  
Stipulatione.*

*Ad*

*Ad Regulam Catonianam.*

*De Jurisprudentia Muciana.*

*Ad Legem Vocomiam, Falcidiam, Ju-  
lianam Papiam, Poppæam, Rho-  
diam, Aquilam.*

*Justinianus, sive de Jure Novo, Libri  
quatuor.*

*Notæ ad Lib. I. & II. Digest.*

*Disputationes duæ ex Papiniano.*

*Ad Edicta Veterum Principum Rom. de  
Christianis.*

*Minutii Octavias Restitutus.*

Hæc omnia BALDUINUS Heidelbergæ edi-  
dit, excusa ab Oporino; quæ ut spero, sola suf-  
ficient, ut ejus diligentiam aliquam indicent,  
& tuam simul maledicentiam reprimant. In-  
terea BALDUINI domum Heidelbergæ fuisse  
veluti liberale quoddam Pandochium \*, præ-  
sertim peregrinorum Anglorum, atque Gal-  
lorum, quibus humanissimè semper patuit,  
neque ignorare, neque negare potes. Si du-  
bitas, saltem interrogato tuos, duæ nuper  
militiæ Duces fortissimos, SECHELIUM, & LU-  
ZIUM: Speramus enim, tantum in iis etiam-  
num superesse & generosæ ingenuitatis, &  
grati animi, & bonæ fidei, ut dicturi, etiam  
invito te, sint, quod verum est.

Sed

\* Diversorium, Hospitium.

Sed de discessu BALDUINI, Heidelbergam  
relinquentis, conquereris. Cur ita? Non est,  
Theodore, Jurisconsultorum, quæ vestra est  
conditio. Vos, si Ecclesiæ (ut jactatis) Mi-  
nistri estis, & ullis Legibus, Canonibusque  
Ecclesiasticis tenemini, non potestis ab Eccle-  
siâ, cui mancipati semel, & adscripti estis,  
discedere. De te non loquor, quem nullæ  
tenant Leges: Loquor de iis, qui minus dis-  
soluti sunt. At Juris interpres non ita est uni-  
allicui loco vel in perpetuum adstrictus, vel  
alligatus; imò verò Papinianum suum audit,  
negantem, tali conditione posse infringi liber-  
tatem ingenui hominis.

Quid igitur? Cùm BALDUINUS jam præ-  
tississet, quod suscepérat, & tempus, quo se  
se Heidelbergæ Jus interpretaturum esse spo-  
noderat, effluxisset, petiit missionem. Non  
potuit impetrare: Nam non solum Academia  
tota, sed & ILLUSTRISSIMUS PRINCEPS  
ELECTOR, non solum sponte aucto hono-  
rario, sed & suæ erga Literas Bonas benevo-  
lentiæ testificatione majori potius impetravit,  
ut BALDUINUS uno, aut altero etiamnum anno  
perpoliret, quod inchoaverat; huic tametsi  
Princeps ille, Vestræ Conjurationis Sacramen-  
tariæ hostis acerrimus, aliquando minus de-  
ditus fuisset propter suspicionem vestræ Con-  
tagionis: Adeò nunquam, nisi propter Vos,  
BALDUINUS periclitatus est: Nam etsi minimè  
omnia

omnia vestra probaret, tamen quia de multis  
vestris hominibus bene mereri non desinebat,  
probare credebatur.

Mortuo illo Principe, cùm sentiret, mi-  
ris cuniculis se se insinuantem magis, atque  
magis illic invalescere vestram Factionem, an-  
miraris, si de discessu aliquando cogitārit?  
Certè optabat aliquem jam tranquilliores se-  
cessum, ut Ludos vestros neque audiret, ne-  
que videret. Tu tuo more, quidquid tandem  
voles, malitiosè singas: Sed ita se rem habere  
liquet, ut dicam; si modò rursus Lectores  
obtestatus fuero, mihi ut veniam dent, si diu-  
nius leviculis istis, & exilibus narratiunculis  
rerum propè inanum eos obtundam. Adver-  
sarii curiosa, & impudens calumnia ad hanc  
nos defensionem cogit. Quam fabulam hic  
narret, legant, qui volent: Ego notam, &  
simplicem veritatem opponam.

Mittebat Illustriss. Princeps FRIDERICUS  
Palatinus Filium suum CASIMIRUM in Lotha-  
ringiam: Eum ex sententiâ Patris comitatus  
est BALDUINUS, qui indè in Galliam, rei pri-  
vatæ causâ, cupere se proficisci non dissimu-  
labat. Sed de migratione alioqui tam nihil  
statuerat, ut, Heidelbergæ relicta totâ Fami-  
liâ suâ, Uxore, & liberis, solus sit profectus.  
CASIMIRO Principi Comes tam gratus fuit,  
ut non aliâ, quam ejus mensâ uteretur, cuius  
&

& sumptu, ex sententiâ quoque Patris, iter  
unâ peragebat. Cùm ventum est ad Oppi-  
dum Barrense, in eo substitit CASIMIRUS, Du-  
cem Lotharingiæ, qui in Galliâ erat, exspecta-  
turus: Cùm optimâ autem Ejus gratiâ BAL-  
DUINUS institutum iter persequitur; &, ut fit,  
in medio itinere incidit in Aulam Regiam: In  
quâ cùm se ignotum esse putaret, agnoscitur,  
atque salutatur à pluribus, quâm vellet. Unum  
nunc, honoris causâ, nominabo Virum am-  
plissimum, PAULUM FOXIUM, Senatorem  
Nobilem, Reginæ Franciæ, & Navarræ Cog-  
natum, & Regis postea in Angliâ Legatum:  
Qui unus rem totam tenet, & tam potest gra-  
vißimo suo testimonio omnes Bezanas calum-  
nias refellere, quâm liberali patrocinio hacte-  
nus BALDUINUM defendit. Is cùm hunc nun-  
quam antea vidisset, ocurrentem fortè inter-  
rogat, num ipsus esset, cuius in MINUTIUM  
fortè Praefationem tunc legerat. Agnitum, &  
propè restitantem dicit ad Navarrum. Na-  
varrus pro suâ incredibili humanitate, cùm  
intellexisset, eum esse, quem sua Socrus  
in Academiâ Biturigum olim aluerat, & Ger-  
mania postea evocarat, jubet, Lutetiæ Pari-  
fiorum ut ad se redeat: Se enim de Republ., &  
Controversiis, quæ tum agitabantur, colloqui  
velle. Non potuit id recusare BALDUINUS,  
tametsi nihil unquam quidquâm magis illi præ-  
ter opinionem accidisset.

Lutetiæ

Lutetiæ à Navarro ducitur ad Reginam: Indè mittitur ad Cardinalem Lotharingum. Si, quānam commendatione tam repente Principibus innotuerit, rogas; quære abs iis, qui commendarunt: Sunt enim ii & familiariter tibi noti, &, tuo quoque judicio, fideles. Si, qualia fuerint colloquia, etiam rogas, de Religiosa Conciliatione Controversiarum fuisse, velis, nolis, intellexisti. Interea Ministellos quosdam, nescio quo veluti terrore panicco perculfos, frustra trepidasse Lutetiæ, & cæca invidiâ incitatos, multa adversus BALDWINUM molitos esse, non nescimus. Sed ille bonâ conscientiâ subnixus tam eorum fatuas, ventosâsque calumnias securè contempfit, quam nunc contemnit tuas. Et interea dum retinetur à Navarro, tam abs suis prioribus studiis alienus non fuit, ut etiam tunc ediderit Libros duos προλεγομένων \* de Institutione Historiæ Universæ, & Ejus cum Jurisprudentiâ Conjunctione \*\* Irrideas nunc eos, ut voles, nasute Zoile: ut risu inepto nihil esse ineptius, sic Sardonio \*\*\* nihil esse flebilius, quidam olim rectè dixit. Ergo (ut tuus Martialis ait)

Nasutus

\* Prolegomenorum.

\*\* Libri hi Parisiis anno 1561. prodierunt.

\*\*\* Sardonia herba, Apiastro similis, quæ nascitur in Sardinia: ea si quis vesicatur, nervos contrahit, & rictu diducit ora, ut, qui moriuntur, veluti ridentium facie intereant. Inde *Sardonius Ritus*, pro risu ficto, aut infano.

Nasutus sis usque, licet; sis denique nasus,  
tuas sannas nihil moramur.

Tandem Navarrus BALDUINUM remittit cum optimis Mandatis in Germaniam, cùmque honestissimis literis ad Palatinum, ut, bonâ Ejus gratiâ, BALDUINUS cum Familiâ suâ totus in Galliam revertatur huic Reipubl. operam datus. Hic cùm Palatinum alloquitur, intelligit, vos interea non cessâsse, dum absenti struitis insidias, & nulla non propterea fingitis, spargitisque portenta Calumniarum: Sed optimum Principem frustra à Vobis esse tentatum. Sic optimâ Ejus gratiâ, discedit, & suam Juris Scholam, commendat duobus optimis, atque doctissimis suis Collegis, NICOLAO CISNERO, atque GASPERI AGRICOLÆ, Illum in Galliâ, hunc in Germania Discipulum, atque Auditorem habuerat; sed tantò lubentius utrumque deinde habuit Collegam. Et nos nunc eos, honoris causâ, lubenter appellamus, quos tu, cum enumerares Collegas BALDUINI, improbè præteristi, ut alias duos indignos substitueres, qui, ut dictum est, nunquam BALDUINO Collegæ fuerunt.

In Galliam reversus, statim sensit, vos in Aulâ multò magis movisse omnem lapidem, ut, Navarro abalienato, novus Hospes cum Familiâ novo exilio jactaretur: Sic enim hi Clarissimi Fratres multis jam annis Hominem de ipsis nimium bene meritum incredibili rabi-

bie, & insatiabili odio persequuntur, ubique intenti, ut ei insidentur, ut noceant, ut eum nusquam quiescere, respirare nusquam patiantur. Quod quoties mecum reproto, propè attonitus exclamo illud : Musa, mihi causas memora &c.

Ergo, ut in Germaniâ nihil prætermisserant, si quid fortè nocere illi possent; sic in Galliâ multò magis, cùm & Navarrum tunc in suâ potestate habere sibi videbantur. Sed gratiae agendæ sunt clarissimo Viro, PAULO FOXIO, qui suæ fidei memor, neque veritati defuit, neque innocentiae. Is cùm tibi familiaris alioqui in Aulâ esset, & sit vir eâ Virtute, sapientia, dignitate, Familiâ, ut talis viri verbum unum debuerit te comprimere, tamen maluisti morem gerere insano tuo in BALDUINUM odio, sentires licet, te nihil agere.

Sed cur hoc miraremur? Eodem tempore ipse tuus PERRUCELLUS, qui abs Principe Condensi evocatus ex Germaniâ, reversus fuerat, quâ & calumniâ, & perfidiâ ab te exceptus est? Jam pridem enim hominem pessundare conabar. Meministi, quâ turpiter tuam in eo exagitando, in ipsâ tunc Aulâ insaniam ostenderis; & quanto tamen judicio, cum summâ ignominiâ tuâ, calumniæ damnatus sis. An BALDUINUM vel ejicere, vel dejicere facilius te posse putabas? Sed magnam tuæ malevolentiae causam alle-

gas, quia in eo conventu, sive Aulico, sive Posiaco, ille te non salutasset, neque ad te sua consilia retulisset. At cur tu potius ad eum non veniebas? Nam, sive personam, sive dignitatem spectemus, cur ille potius ad te, quam tu ad illum? Imò verò (inquis) eram propè, quod PAULUS de se ait, *κλητὸς Ἀπόστολος*\*. Unde hoc probas? Vocatus (inquis) eram abs Navarro, & ejus eram Apostolus. Quomodo cùm te obtrusisses, vocatus sis; & cùm antea ad eum excurrisse ad Pyrenæos usque montes, quomodo te insinuaveris, & quid tunc captaris, aliàs dicam. Sed fueris sanè vocatus: quomodo te Apostolum probas? Quoniam tandem ab eo es missus: Dimissus potius statim ignominiosè fuisti, & jussus redire, unde veneras. Cur ita dimittenti, ut antea vocanti, ô noster Apostole! non paruisti? Imò verò cur ne Navarri quidem baculo, & armis abigi potuisti? Dices, quia non sit Apostolicum fugere. Vah quid cum isto irrisore agimus? Sed nihil hæc ad BALDUINUM. Cur autem hic te non adorârit, si quæris, hoc scito: Cùm obstupesceret eam esse impudentiam tuam, ut frontem tot infamiae notis iustam etiam auderes ostentare in tam nobili Conventu Regum, Principum, Antistitum, & clarissimorum Virorum: tum verò quo tenderes, quid captares, & quisnam esses, jam pri-

---

\* Vocatus Apostolus.

pridem tam valde sciebat, ut nihil sibi tecum  
negotii esse optaret.

Neque tamen nulla fortasse causa fuit, cur  
eum, quem contemnere te fingis, reformida-  
res. Sed tanto magis ingratus es, cum illi gra-  
tias non agis, quod cesserit, quod tibi non oc-  
currit, quod se non opposuerit; denique tibi  
pepercerit, quem occupatum satis supérque  
videbat. Quis verò jam non miretur, audie-  
re etiamnum te mentionem facere Posiaci  
(ut vocas) concilii, in quo tam gloriose scili-  
cket triumpharis, cum jussus, tuæ vocationis,  
& Ministerii extraordinarii rationem reddere,  
tam vel turpiter obmutueris vel impudenter  
eluseris. Nempe quā confidentiā illius sive  
collationis, sive disputationis acta falsa evul-  
gāsti, eādem putāsti posse te totius historiæ  
veram memoriam delere. Sed (quod sāpe  
facis) iterum erras, confidentissime Magister;  
Acta & vera, & integra, bene consignata su-  
persunt, quæ, cum erit necesse, proferentur  
cum sempiternâ nominis tui infamiâ; si qua  
modo infamia major, aut cumulatior esse pos-  
sit, quām sit ea, quæ jam pridem te urget.  
Quid verò, quid si etiam aliquando in lucem  
prodeant illa consiliorum tuorum Mysteria, in  
nemore Posiaco, & opacis ejus spatiis, vel  
umbraculis eo tempore jaētata; & quidquid  
in eo genere lucus ille Sangermanus (vos Cō-  
ryli testes) audivit, & rexīt: an nihil erit, cur  
gloriosæ tuæ jaētationis te pudeat?

Spectabat illas tuas strophas, atque anti-strophas BALDUINUS, neque non, in quam catastrophen erumperent, prospiciebat: Sed nunquam os aperuit, ut iis intercederet. Ingemuit quidem, bonam Galliam tanto studio res bonas quærerent, quodam errore (ò miseram!) incidiisse in talem Magistrum τῆς ἀνταστίας \*, in talem Ministrum confusionis, in talem Stellionem, talem Pseudolum, talem impostorem. Sed nihil aliud, quām in tacito finu deflevit talem indignitatem; tibi alioqui non fuit molestus. Nam neque est tam (ut ais) πολυπράγμων \*\*, ut rebus, alioqui ad se non pertinentibus, ultrò se aut ingerat, aut immisceat. Itaque te facile passus est tuo arbitrio insanire, dum hominibus rerum imperitis illudis, &, tanquam offusâ quādam nocte cæca, miseræ Galliæ, te venditas. Verum tu illius quoque silentium suspectum habebas, & nescio quomodo tibi ab illo metuens, securo, & tranquillo animo esse non poteras.

Ergo ad eum opprimendum, quia una non successerat, aliâ aggredieris viâ. Ex tuo Acherronte Lemannico evocas novum fulmen, quo eum & vehementius percelleres, & longius abigeres. Incitas enim Jovem tuum, ut exagitans quendam CASSANDRI libellum, qui tunc forte

---

\* Tumultuationis.

\*\* Variè industrius.

fortè prodierat, & erat tuis actionibus molestus, BALDUINUM famosissimā aliquā declamatione vexaret. Concurrebant omnes eo tempore terrores, quibus BALDUINUS propè examinari posset: prospiciebat enim, quid ageretur; sed se ipsum bonā conscientiā obfirmavit, & terribili adversario statim objecit leges de famosis libellis, déque calumniatoribus, si quid illæ fortè possent in Jure adversùs vim.

Tu jam eum commentarium clamas esse pessimum. Sit sanè tibi, & tuis pessimis, qui sententiam de vobis capitalem optimo Jure dicit: sed multò fuisset melior, si justus legum Executor, fortisque, & acer vindex accessisset, qui te docuisset, quid sit illud: *Si calvitur, manum endo jacto*\*. Qualiscunque autem sit commentarius ille, rogamus, ut ab iis, qui de hâc totâ causâ judicare volent, relegatur, ne ex eo plura, quæ hoc aliqui loco repetenda essent, nunc otiosè describere cogamur. Debueras autem, BEZA, siquid in eo reprehendere posses, illud nunc expnere, potius quām hæreres in jejunâ, & inepta, & fatua, & puerili quæstione de illius privilegio: non enim res digna est, quæ te maceret. Jam Magister tuus in ea cavillatione judicatus erat tam valde ineptiisse, ut pudore quodam eam abjecerit. Tu, qui quidvis fin-

M 3 gen-

\* Verba hæc de præmpta sunt ex Leg. XII. Tab. vid. GOTHOFREDUS in *Font. quatuor iur. civil. Libr. I. Tab. I.*

gendum esse putas, potius quam ullam vel levissimam culpam agnoscas, in ea quoque ridicula stultitia peritas, & ait, millies te abs ipso Typographo Vechelo audiisse, quod es commentus. Atqui ne, si velimus quidem, id evinces: & ipse hodie interrogatus respondit: nunquam se tecum, nec te cum illo ea de re esse locutum. Itaque, semel mentiendo, millies mentitum esse te, significas. Verum levissimum hoc tuæ vanitatis, & fidei peccatum sit.

Non minus phreneticum est mendacium, somniūmque tuum, quod eodem tempore, quo BALDUINUS Lutetiæ habitabat, & illi commentario dabat operam, affirmas, secutum esse Cardinalem, Rhenum versus proficiscentem ad salutandum Ducem Wirtemburgensem. Si ita esset, lubenter id confiteretur, neque in veritatis confessione, invidiae insidias extimesceret; sed impudens esset ambitio, si agnosceret, quod objicis. Quid verò tu, cum tam valde eo tempore negasses CHRISTI corpus duobus in locis ullo modo esse posse, nunc fingis, eum, qui erat Lutetiæ, esse prope Rhenum? Nimis enim longum intervallum est. Narrare potius debueras, Argentorato STURMIUM, & ZANCHUM tunc venisse, ad salutandum in eo colloquio Cardinalem. Quod quidem in vestris hominibus quâ patientia toleraris, quâ gratia dissimulaveris (erat enim ea, tuo iudicio

cio certissima Professio Apostasiæ) fortasse mirarer: Sed abs vobis vel antea, vel postea impetrasse dispensationem (ut vocant) dices. Itaque cedo.

Ut in totâ tuâ Fabulâ saepius elegantiâ quâdam Poëticâ videris amâsse ὑσερον, πρότερον \*, sic & hâc rursus figurâ usus es, cùm non modò Commentarium de Famosis Libellis notare voluisti; sed & quas deinde BALDUINUS Lutetiæ exorsus est coniunctas Prælectiones Juris Civilis, atque Historiæ Universæ. Quid autem in iis, quibus nescio an interfueris, & de quibus, si interfuiisses, judicare non poteras, reprehendere nunc velis, quas admirari fortasse magis deberes, quâm imitari posses, equidem non intelligo. Principio confiteris, te non esse eorum rerum idoneum Judicem. Postea (credo, ut id verè dicere te probares) ais, non modò quendam, qui Lausanæ in docendâ Grammaticâ tibi Hypôdidascalus \*\* fuit, sed & Chalcographum tuum, in Jure Civili posse BALDUINI Præceptorem esse. Ne nimium commovearis, Theodore: Nullus est, à quo BALDUINUS recusat discere: Est enim Φιλομαθής \*\*\*. Quid verò Librarius ille tuus, qui dum pus tuum exprimit, jus novum suxit, præstare in hâc arte possit, optaremus, alio,

M 4

quâm

\* Hysteron Proteron, hoc est, inversum ordinem.

\*\* Magister secundus, seu Repetitor.

\*\*\* Discendi cupidus.

quām de suis Apostatis Commentario expreſſisset. Tu quidem eum meliūs doceres, quid ſit vis, quām quid ſit Jus. Et nos paulo pōt ſingulare exemplum tuæ Jurisprudentiæ fideiſſimè proferemus. Sanè ſi tam præclarus Ju-  
ris Doctor eſt Typographus tuus, tu tantō in-  
justior es, qui eum prælo mancipas, tanquam  
pistrino. Quid autem, quid ſi BALDWINUS  
coquum ſuum tibi Religionis Magiſtrum eſſe  
poſſe, vicifim dicat, ſi ea conſiſtit in Conſcien-  
tiā bonā potiūs, quām in ſcientiā magnā, nā  
ille Praeceptor tibi eſſe profecto poſſet.

Verūm tu in miſcendo jure lepidior co-  
quus videris: & ebulliente olla fumantis, &  
effervescentis iracundiæ tuæ, facetus etiam  
eſſe voluisti, dum non ſolūm BALDUINI Jura  
cruda, recocta, rancida, dicacitate minimè  
ſcilicet iuſta ſæpius appellas; ſed & Ejus  
Auditores, doctiſſimos Viros miris ſannis con-  
ſpuis, despumans, eſſe recoctos Caufidicos,  
rabulas, fori mancipia. Scimus sanè, vos jam  
pridem incredibili quodam odio Jurisconſul-  
torum flagrare; neque cauſam nescimus, cur  
eos, qui in eo genere excellunt, pefſundare  
velitis: Ut jam minūs miremūr, quod multi  
mirantur, vos etiam nuper Lugduni Mol-  
næum, magni nominis Jurisperitum, jam fe-  
nem, qui veſtrâ cauſâ pertulit tam acerba  
multa, in periculum capitis vocaſſe, cùm forte  
leviter abs nescio quo veſtro Paradoxo diſſen-  
tire diceretur.

Scimus,

Scimus, jam pridem hoc agere vos, ut, Episcopis exterminatis, Ordinem Togatorum non minùs, quàm Nobilium evertatis, atque pessundetis.

Verùm, mi BEZA, etiamnum dissimulare, quod tentas, debueras. Certè nescio, an tibi satis caveas, consulásque, Vir consultissime, dum ita insanis. Cæterùm Jurisconsulti tunc tibi respondebunt, cùm eorum, quæ perpetrasti, facinorum reus, attonitus implo-rabis eorum non Patrocinium, sed depreca-tionem, & præsens, statúsque senties, quale sit justitiæ Tribunal, scopulus tuus; & quàm justi, ac severi tibi immineant Judices, simul & Vindices tuorum scelerum. Interea in isto tuo antro, & Arce impunitatis, quid mira-mur, si tu clarissimis Jurisconsultis ventosa, & inani tua garrulitate insultes, cùm etiam amplissimos Senatores, & maximos Judices supremæ Curiæ appellare latrones, cùm istic latitas, nunc ausus sis? Nempe ut istis Toga-tis longè anteferres sagatos nescio quos tuos miseros Syndicos, Allobrogas, quorum Col-legium paulò post amplissimum Senatum ap-pellas.

Fateor, ô mi Minister, Prædicánsque, cautè feceris, si eos demum Judices semper habeas, quibus tu præscribes, quid de te pronuntiari velis: Nam coram aliis malè tecum ageretur. Sed si imitari volebas illum P. Sulpitium, Tri-

bunum pl. seditiosissimum, qui Romæ habuit suum Contra-Senatum, debebas paulò splendidius præsidium comparare. Neque verò nescimus, cur illi Foro Palatino, quo nihil habet Gallia illustrius, tam sis & iniquus, & inimicus. Sed ut propterea BALDUINO tam valde infestus quoque sis, causa nulla est: Nam, ut tibi gratificetur, raro marmor utrumque terit.

Ut Jurisprudentiam, sic historica studia BALDUINI eâdem dexteritate subsannas: Neque dubium est, quin eundem Chalcographum tuum in iis rursus Doctorem nostrum esse velis, qui non solum SLEIDANUM sæpius excudit, sed & quandam de statu Universæ Ecclesiæ Historiam compendiosam: Quam quidem te vehementer laudare, atque admirari nunc demum intelligimus, quia confirmas, nullos eum libros, nisi optimos, maximos excudere. Non possumus diutius dissimulare tantam indignitatem: Si qua unquam fuit putida, & insulsa farrago vanitatis, atque falsitatis; si qua impura sentina fabularum, atque τῆς ἀντιστασίας \*, illam profectò esse altissimâ voce profiteri cogimur: idque tantò magis, quod in rebus Ecclesiasticis multò sit, quam in Civilibus periculosior impostura. En cur JOSEPHO, ac NICEPHORO præferre debueris illam vestram novam rapsodiā.

Equi-

---

\* Ignorantiæ historiarum.

Equidem jam etiam mirabar , quid sit ,  
 quod nunc scribas , BALDUINUM pati non pos-  
 se , ut illi inter fabulosos Scriptores numeren-  
 tur ; & contrà magis , atque magis confirmes  
 JOSEPHUM , Sacerdotem rerum Sacrarum valde  
 imperitum fuisse ; & negligentem , profanum-  
 que Scriptorem ; Nicephorum verò supersti-  
 tiosum , & Græcorum vanitati deditum .  
 Quorsum hæc (inquam) tu nunc inculces ,  
 dubitabam : Sed postea intellexi , velle te tan-  
 quam soricem tuo indicio perire ; posteaquam  
 legi , quid eâ de re scripsisset BALDUINUS in  
 Libro de Institutione Historiæ : Quod quidem  
 velim , etiām relegant ii , qui hujus Quæ-  
 stionis Judices esse volent .

Ne autem quidquam historicis Illius ad-  
 monitionibus debere te , aut ullam *ἀνισοη-*  
*σίας*\* culpam agnoscere videaris , excusas etiam ,  
 quod CALVINUS scripsit , SABELLIUM surrexisse  
 post Arium : Tametsi inficiari non possis esse  
 (ut vocas) *μηνιονικὸν αἰώνιμα* \*\* . Et , ut  
 omnes intelligent , nihil esse tam absurdum ,  
 quod aliquo Scripturæ Exemplo defendere  
 non possis , non erubescis , notare , apud Lu-  
 cam de Theoda \*\*\* tale quidpiam reperiri ,  
 ex sententiâ nostrorum quidem (ut ais) Ca-  
 tholicorum . Atqui , ô bone ! ipsum tuum

CALVI-

---

\* Ignorantiae historiarum.

\*\* Lapsum memoriae.

\*\*\* vid. Act. Apost. C. 5. ¶. 36.

CALVINUM ex eorum numero hâc in re esse, tu ipse annotâsti, &, aliâ interpretatione prolatâ, Lucæ locum ad Historiæ fidem, & ordinem alium revocâsti. Et nondum confiteberis, te tuî oblitum, jam non curare, quid dicas, vel non dicas, modò causæ malæ serbias.

Denique ne in Historiâ quidem illius judicii, quo CÆCILIANUS, & DONATUS olim conflictati sunt, quam Magister tuus minimè bonâ fide exposuit, & tu (ut etiam ejus sputa lin gere soles) eâdem fide contorsisti in tuæ scilicet Fidei Confessione, agnoscere vis ullum peccatum vestrum. At nesciebas, ô miser! cum eâ de re scriberes, eodem tempore hîc excudi Libros OPTATI MILEVITANI, & ad eos Præfationem quandam BALDUINI,\* in quâ liquidò refellitur tota illa vestra hujus rei inscitia. Quia spero, saltem jam abs te lectam illam Præfationem esse, nihil adjicio. Nam & in eâ senties alios aculeos, qui vestram pungent ἀνιστορίσαντες \*\* Ecclesiasticam; qui si vos nondum excitant satîs, aut ad aliquam correctionem non revocant, spondeo, fore, ut si in hanc arenam descendere velitis, BALDUINUS palam exponat, & convincat, vos in compluribus aliis capitibus, eâdem five culpâ, five frau-

---

\* vid. S. Optatus a DUPIN editus pag. 111.

\*\* Historiarum ignorantiam.

fraude, Historias Ecclesiasticas, quibus abutimini, depravare, &, quale, quantumque hoc Falsi crimen sit, liquidò patefaciat. Interea frustra hoc agis, & tentas, ut illi exutias talium Literarum Studia, quibus se solis confolatur in hac temporum confusione, & in quibus videt, factum jam olim esse, quod nunc fit; & ex quibus denique prospicit, quid tandem sit futurum, hoc est, quis futurus sit exitus Tragoediæ vestræ. Nunc reliquas prosequamur tuas criminationes.

Interea dum BALDUINUS, te longum valere jusso, dat operam Jurisprudentiæ, simul & Historiæ, Rex Navarrus, ut se tuis calumniis nihil moveri ostenderet, voluit Filium suum naturalem *Carolum Borbonium*, quem unicè diligebat, apud BALDUINUM educari. Ne id quidem præterire potuisti, quin reprehenderes. Quid ita? Quia (inquis) est Puer Episcopus. Non est ita, Mome! non est (inquam) ille Episcopus: Ubi erit, tu, ut Vicarius, aut (ut loquuntur) Suffraganeus illi sis, accerseris. Sed neque tam Puer est, quin & sentiat injuriam necis Paternæ, & intelligat, quam tu Nomini, & Sanguini Borbonio injuriam facere nondum definis, & ejus ulti or aliquando esse possit. Interea quid est, quod toties increpas παιδαγωγιαν\*, tu, qui tam

---

\* Institutionem puerorum.

tam famosus es, non solùm δημαρχώς \*,  
sed etiam (ut noster Josephus tuum Apionem  
Cymbalum Mundi vocat) ὀχλαρχώς \*\*.

Ventum est ad tempus belli (ut vocas) Ci-  
viles : In quo cur tuam causam agere velis, si  
modò posses, magna causa est, o Franciæ Ca-  
pur, horum & Causa malorum ! Sed jam in  
ea Quæstione non immorabimur, quia nihil  
ea ad BALDUINUM, qui toto bello nihil aliud  
fecit, quam quod domi suæ inclusus deflevit  
Reipubl. calamitatem. Quid enim aliud face-  
ret ? Quid in hac urbe etiam ageretur, cum  
plebs à vobis irritata fureret, ipse in Suburbio  
dolens audivit. Sed nihil eorum vidit, quæ  
narras, non magis quam si Venetiis fuisset:  
Adeò in Suburbano suo Secessu abditus, oculos  
avertit. Itaque (ut uno verbo dicam)  
quidquid de spectaculis Tragicis illi objiciis,  
& de te, & tibi dictum esse, & ad te potius  
pertinere scias, ut non intercidat, quod tem-  
merè scripsisti.

Eodem tempore Magister tuus BALDUINUM  
vexavit, non quidem respondens legibus de  
famosis libellis, deque calumniatoribus (non  
enim audebat, neque poterat in manifesto  
peccato deprehensus) sed spargens virulentam  
maledicentiæ farraginem ex plurium convitia-  
torum

---

\* Plebis Ductor, qui plebem scit ducere, quo  
vult.

\*\* Concitator plebis.

torum rabie collectam, atque conflatam. Huic BALDUINUS statim objecit alteram suam respon-sionem, quam nunc demum exagitas toto post sesquianno. Cordati lectoris erit, & judicis, re, & causa cognita, pronunciare, quod æquum est. Sed profecto BALDUINUS post il-lam suam respon-sionem non dubitavit, eos tandem aliquando aliud quidpiam certamen moturos esse.

Interea quomodo Italiam, atque adeò Tri-dentum, & quo fructu profectus sit, superius expositum tibi est, pluribus etiam fortasse ver-bis, quàm volebas. Reversus, in gratiam sci-licet tuam, & tuorum, suum ad leges Maje-statis, atque Perduellionis commentarium edi non recusavit: quem si nondum legisti, legas, velim, ut plura, quæ te exerceant, audias; & jam ex iis nihil repetere cogar, quod alio-qui fortasse repeterem.

Et quoniam, quam semel vitæ alienæ ra-tionem tibi reddere cœpi, pertexere debeo, de eo, quod reliquum est, verbum unum addam. Reversus, (ut dixi) BALDUINUS, scis, quid fecerit, quod tibi doleat. Jussu, & mandato Reginæ, invisit PRINCIPEM CON-DENSEM, qui tunc aliqua custodia teneba-tur; & cum eo familiariter (quid est enim illo Principe humanius?) est collocutus de aliqua ratione conciliandarum controversiarum reli-gionis: de qua & rursus cum eodem jam libe-rato

rato contulit: &, nisi si vos obstitissetis, fortasse fundamenta Christianæ concordiae jaēta fuissent. Capita privati ejus colloquii, bello etiamnum flagrante, jussus etiam est conscribere. Quæ occupatio fecit (nihil enim jam tibi dissimulamus) ut suam ad DuceM Guy-  
sium, ad quem cum litteris, quas ad eum habebat, iturus alioqui statim erat, institutam profectionem distulerit: intereāque omnem ejus deinde salutandi occasionem amiserit. Ereptus enim tuo, ô BEZA, beneficio ex hâc mortali vita est DUX ille magnus, qui tamen paulò antè humanissimas ad BALDUINUM literas dederat. Acerbum BALDUINO vulnus inflixisti, cum tui Navarrum confoderunt. Nunc plagam alteram addidisti, neque minorem, neque leviorem, cum alterum illum Principem trucidasti. Et nondum satiata est crudelitas tua? Sed aliàs audies graviorem & nostram, & Galliæ lugentis querimoniam.

Nunc, quod quærebas, habes aliquot actus, & scenas non fabulæ, sed vitæ ejus Viri, in quo falsis obtrectationibus vexando frustra te ipsum partim oblectas, partim vexas: ut olim Ajax μαστιγοφόρος\* arietem pro Ulysse furens corripuisse dicitur, at in eo cædendo & se oblectaret, & suam, si posset, vel vindictæ cupiditatem expleret, vel maniam exsatiaret. Ut autem nostra Narratio simplici sua veritate depellit,

---

\* Flagris percussus.

depellit, quascunque odiosas mendaciorum  
nebulas affingere, atque offundere voluisti:  
sic jam brevi responsione refellendum esset,  
si quid, quod ad causam principalem, quam  
tuendam suscepisti, valde pertineret, attulisses.  
Sed quid, ô miser, adferre posses? Liceat  
jam sanè tibi extraordinario quodam jure age-  
re, & postulare: remittantur præscriptiones,  
quæ tibi homini ἀτίμῳ \* os obstruunt. Nihil  
tamen adfers, quod clientem tuum aut suble-  
vet jacentem, aut sustineat labascentem.

Quæ alibi sint victoriæ tuæ, quæ trophæa,  
non inquiero: in hâc certè causâ tuâ nimis ma-  
nifesta est offensio tua. Non est fortasse cul-  
pa ingenii tui; sed malæ causæ ea est conditio,  
ut nullius, quantumvis excellentis, & inge-  
niosi Patroni artificio defendi possit. Credo  
equidem te tibi videri Rhetorem majorem illo  
etiam Protagorâ, qui profitebatur, atque pol-  
licebatur τὸν ἡττω λόγον κρέπτω ποιεῖν \*\*.  
Sed nullus tam peritus medicus est, qui mor-  
bum lethalem sanare possit. Fortasse legisti,  
quod noster Accursius ait; nullam esse tam  
malam causam, quam peritus Advocatus non  
possit bonam facere: cùmque toties inveharis  
in Causidicos Curiæ Palatinæ, quorum artifi-  
cio fieri dicas, ut mendacium pro veritate ha-  
bea

\* Honore carenti.

\*\* Defectuosam causam meliorem reddere.

beatur, nescio, an plus etiam præstare te posse confidas: Sed hic minimè potuisse te liquet. Quid enim? Sive ea, quæ alioqui levia, & nihil sunt; sive ea, quæ seria, hic tractes, nihil agis.

Prima illa facti quæstio, cuius sit libellus de officio pii viri, jam pridem ipsius CASSANDRI testificatione, assertione, atque vindicatione; imò & CALVINI (tametsi culpam aperte non confiteatur, quia non solet) tacitâ quâdam confessione definita est: tu tamen ridiculè actum agis, & nihilominus, quod non credis, aliis persuadere vis, libellum nempe esse BALDUINI: & ut id efficias, (quid enim non efficeret ars tua?) nescio quas nebulas inanum conjecturarum colligis, oblitus, quod Jurisconsulti ajunt, non esse conjecturis locum in re liquidâ. Non esset res digna, in quâ immoraremur: sed utile est, indomitam pervicaciam tui ingenii magis atque magis conspicere. Faciliùs quidem persuaseris, nivem esse atram, quâm meum esse tuum, aut tuum esse meum, ubi nulla ne societas quidem est, aut communio. Vis tamen, ut, quod BALDWINUS probavit, nullo modo esse suum, & CASSANDER suum in solidum esse probat, etiamnum probare esse BALDUINI. Magna (scio) & admirabilis est tua πειθώ\*. Nulla enim tam obstinata olim fuit in Galliâ virgo, quam illa non

---

\* Persuadendi vis.

non expugnârit, hoc est, cui non persuaserit, quidquid velles. Sed nobis persuadere, quod jam vis, ne si ipsi quidem vellemus, nunc posses. Interea nimis erga Adversarium liberalis, ac propè prodigus, ac profusus es. Alterum præterea quendam libellum, sub Christiânorum Jurisconsultorum titulo Argentinæ editum, uni BALDUINO in solidum quoque adscribere vis: nisi si captiosè id facias, ut deinde Plagiarium esse clames, qui alienos libros pro suis agnoscat; & ambitionem ei exprobres, quasi se in Germaniâ solum Christianum Jurisconsultum fuisse profiteatur.

Ubi vides in hoc diverticulo vix te posse consistere, confugis ad alterum. BALDUINUS in secundâ suâ ad CALVINUM responsione obiter quæsierat, an vestrum esset de Hæreticis (quos quidem Hærefoes judicatis) leges capitales ferre? ultimum iis supplicium decernere? palum desigere? rogum incendere? Quæsierat etiam, an veterum Christianorum leges tam fuissent capitales? Quod ad priorem quæstionem attinet, multa non modò ex AMBROSIO & AUGUSTINO, sed & ex aliis minùs ibi fortasse notis scriptoribus memorabilia protulit, quæ pudorem vobis (si erubescere possetis) incutere possent. Tu illa omnia vel pervulgata scilicet, vel inania esse ais. Alii judicabunt, qui utriusque partis libellos sedato animo legent.

Sed ut BALDUINUM intelligas præterea habere quidpiam: jam tibi suggerit, fuisse olim quendam Theodosium, quem longè superasti, Episcopum Synnадæ, civitatis in Phrygiâ Pacatianâ, qui, quia Macedonianos non solùm urbibus, sed & agris expelleret, dictus est fæcile contra morem ecclesiasticum, & judicatus est dignus, qui abdicaret. Hic fortasse trepidabis, Sed excipies meritò, illum Episcopum tibi esse ignotum, quia etiam nullam fuisse Phrygiam Pacatianam contendas, cùm, volens expungere quandam epistolæ Paulinæ subscriptionem, scripsisti, non meminisse te, usquam hoc Epitheton legi apud idoneos Autores. Verùm quod non legisti, aut non meministi, an nusquam propterea est? Ipse, ipse JUSTINIANUS noster centies ejus meminit. Itaque rectè feceris, si, cùm jam secundam editionem adornes, ineptam illam tuam adnotationem expungas, ut alias sexcentas, de quārum vitio, cùm voles, & erit otium, te admonebimus, & ita admonebimus, ut, postea quam Castellioni (ut vocas) Grammatico satisfeceris, Juris studiosos superesse scias, quibus ne in eâ quidem re adhuc satisfeceris. Nunc, quod instat, agamus.

Altera de coërcitione Hæreticorum quaestio fuit, cùm quæreretur de veterum Legibus. Tu verò in eâ quomodo diligentiam tuam magis approbaveris, breviter etiam videamus.

deamus. Cùm inflamatâ crudelitate perquireres, quidquid sanguinarium, & capitale esse putabas, non veritus es, ad confirmationem tuæ sævitiae, confidenter allegare *L. V. de Hæret. & Manich.* BALDUINUS te admonuit, in eâ lege videri adjecta esse quædam verba capitalis supplicii, quæ non extant in Codice Theosiano, ubi lex illa integra refertur: si-  
cuti neque verba illa convenire possunt cum iis, quæ præcedunt, vel sequuntur, vel cum AUGUSTINI testimonio. Hanc admonitionem non ferens, confidenter retorques falsi crimen, allegans aliam quandam, quam ha& xenus non legeras, legem ex novellarum Theodosii (ut ais) libro repetitam, ubi sanguinis mentio fit. Atqui, mi Doctor, de eâ non quæritur: ne-  
que propterea conficies, eandem esse alteram legem; tantum abest, ut monitorem tuum fal-  
si reum (quod ais) propterea peragas. Tu quidem astutè facis, si tam suaviter elabi pos-  
ses, nobis non animadvententibus: sed fraus  
hæc tua, & suppositio quid aliud, quæm falsi  
crimen tuum conduplicat?

Imò verò in eâ ipsâ alterâ lege, cuius um-  
brâ nunc demum te tueri putas, recitandâ rur-  
sus apertè falsarius es. Lex illa loquitur de  
Paganis, eorumque Sacrificiis: tu Paganorum  
mentionem expungis, & Hæreticorum sub-  
stituis: quâ fide? Nam multùm inter eos in-  
teresse, & magnum eorum discrimen in vete-  
ribus

ribus legibus esse, quod & ipse AUGUSTINUS notavit, non ignoras. Quin etiam illa ipsa lex, posteaquam de Paganis egit, de Hæreticis deinde loquitur longè aliter; nec eos alter puniri vult, quam ex prioris illius, quam dixi, legis præscripto. En, quam fidelis, mi Theologe, nunc sis jurisconsultus.

Fortasse quia ex obscuro, & apocrypho, & obsoleto novellarum, quas dicis esse THEODOSII, cùm sint pœnius VALENTIANI postremi, quodam libello (ut loquuntur) extravagante, quem ALARIKUS Gothus collegisse dicitur, JUSTINIANUS noster nunquam agnovit, tu hodie primùm, suggererent aliquo curioso, vel quæsitore capitali, fortè inspexisti; repetebas, quod jam prætexis: fortasse putabas, nos simplices, stupidos, credulosque leguleios, qui fontes non excutimus, non animadversuros capitalem tuam fraudem, dolumque malum: sic enim & de BALDUINI, solos (ut ais) indices consulentis ignorantia, magnifice Iudex, graviter scribis. Sed tua ignorantia, errorque tuus, vir scientissime, tam te refellit, dum alios fallere vis, ut nemo non videat incredibilem tuam, inscitiam dicam, an audaciam? Quid hic ego advocem legem Cornelianam de fâlis? Quid tuam in recitandis legibus fidem exagitem? Ita nunc, Principes, & arbitrio hujus novi legislatoris inflammate taurum Phalardis, & miserorum gemitum habete pro mutu.

gitu. Vis, tamen aliquid in gratiam tuam dicam, BEZA? Accuso (si vis) veterum legum clementiam, atque lenitatem, cum in acta tua intueror, & propè exclamo, debuisse adversus Donatistas esse acerbiores. Ignoscat nunc meæ severitati AUGUSTINUS: si viveret, & quorundam Bezanorum insolentiam videret, suam & ipse sententiam de coercitione forte iterum exacerbaret.

Cum ne in hoc quidem diverticulo commodè, BEZA, diutius hærere posses, quæris aliud; in quo tam te probes Theologum fidelem, quam in superiori acrem Jurisconsultum esse te probasti. Deligis autem quidpiam, quod ad satanam pertineat, quia de eo lubenter loqueris, & jure familiaritatis potes. Quid verò illud est? BALDUINUS obiter verbo uno CALVINUM fortè admonuerat, temerè eum negare videri, Exorcistas, qui τάς ἐνεργείας \* liberabant, fuisse in ecclesiâ veteri: neque aliqui in eam quæstionem longius ingressus erat: sed minimè hoc esse prætereundum judicasti. Quid igitur? Posteaquam despumasti nescio quid, quod solent ἐνεργεῖας \*\*; exclamas, negasse CALVINUM non rem, sed ordinem, hoc est, sensisse, olim quidem fuisse Exorcistas, sed certum eorum ordinem in ecclesiâ non fuisse. Egregia scilicet defensio! Profers quæ-

N 4

dam

\* Obsessos à Dæmone.

\*\* Obsessi à Dæmone.

dam verba CALVINI, quæ sic interpretaris.  
Sed, ut nihil agis bonâ fide, ea nunc profers,  
de quibus potius quæstio est. Ait CALVINUS,  
Judæis quidem fuisse suos Exorcistas; sed  
Christianorum Exorcistas ementitos appellat.  
Quid hæc verba sibi velint, exponere potius  
debueras.

Imò verò CALVINUS suæ oblitus Institutio-  
nis, in Actis Apostolorum ait, apud Judæos  
fuisse quoddam Exorcistarum munus, quod  
Christiani imitati sint: deinde verò Pāpam vo-  
luisse hoc esse commune omnibus suis Cle-  
ricis. Nonne hīc, quod priùs negārat, etiam  
agnoscit, olim certum quoddam fuisse munus  
Exorcistarum apud Christianos? Nonne repre-  
hendit, factum deinde hoc esse commune:  
Quid tu? Inquis: *Quod ad Exorcistas attinet,*  
*hoc dico, & affirmo, BALDUINE, quocunque mo-*  
*do Exorcistarum nomen accipias, nunquam te*  
*probaturum, certos aliquos vel Apostolorum, vel*  
*proximā Apostolis ætate fuisse designatos, qui*  
*Energumenis manus imponerent.* Atqui jam tibi  
magis res est cum CALVINO, quām cum BAL-  
DUINO: imò etiam tecum tibi ipsi res est; nam  
in tuā confessione, non peccatorum, sed fidei  
scilicet tuæ, cum veteris ecclesiæ Exorcistas  
ais aut cessare, aut cessare debuisse cum dono  
sanationum, fateris olim aliquos fuisse; non  
enim alioqui desinerent. Sed non, ut singis,  
cessasse, proptereaque etiam cessare non de-  
buisse,

buisse, quisquis ullum ex veteribus ecclesiasticis Scriptoribus legit, facile ietelligit.

Visne præterea tuam ignorantiam castigari, quæ te tam facit audacem, juxta proverbium, quod ex Thucidide recitas? Non gravabor obiter te monere, ut probationem, quam requiris, & nullam esse temerè pronuntias, saltem repeatas ex Epiphanio, qui describens Ministeria & ordines veteris Ecclesiæ post Episcopos, Presbyteros, Diaconos, Lectores nominat Exorcistas; quos, credo, non negabis fuisse Exorcistas. Adde constitutionem VALENTINI, & GRATIANI *L. VI. C. de Episcop. & Cleric.*, ubi eadem est enumeratio. Vide, quantum proficias tumultuando, & id, de quo non erat alioqui instituta disputatio, temerè & impotenter exagitando.

Interea frustra BALDUINUM, CASSANDRUM, & (ut ais) quoscunque provocas, veluti sponfione factâ, velle te pro Hæretico censeri, atque etiam (ô duram conditionem!) cremari, nisi probes, ex ipsis Inferis emersisse omnes illas functiones ecclesiasticas, quæ numerantur in Romanâ Ecclesiâ. Nihil hæc quæstio, mi Vir, ad tuum BALDUINUM.

Ceterum si quis Inferorum Angelus ad te retulit, quod affirmas; profer, quas indè accepisti literas, testes tuæ affirmationis. Interea si tam es Inferis, & eorum Antistitibus

N 5 fami-

familiaris, cautè facis, qui Exorcistas abigas  
alio Exorcismo. Neque tamen minùs prop-  
terea & eris, & diceris *διάβολος*\*, quamdiu  
non desinis calumniando veritati adversari:  
minùs ut jam conqueraris, si aliquis te Sata-  
nam, ut tuo tam tibi familiari verbo utatur,  
etiam honoris causâ, vocet. Ipse etiam cau-  
sam reddis: Audivit (inquis) Satanæ nomen  
ex ipsius CHRISTI ore PETRUS, cùm duntaxat  
immodico Præceptoris amore extra metas fuif-  
set abreptus: & nefas erit, eum Satanam di-  
cere, qui tam valde imitatur eum, qui men-  
daci, & homicidii ab initio Parens, Magi-  
stérque fuit? Quid verò, cum Proditorem il-  
lum Judam idem CHRISTUS Diabolum vocaret,  
anon tuum veluti nomen nobis dictavit? Ac,  
ne queri possis, tibi injuriam fieri, ecce tibi  
auricolam vello, & licet. En quām nos ef-  
ficiis eloquentes, dum nobis suggeris, & di-  
ctas, quod & theologicè, & civiliter tibi re-  
spondeamus. Nullum finem inveniemus, si  
omnes istius nugatoris quisquilias excutere  
velimus.

Sed en se se offert alterum Bezanæ fidei,  
& Mathæologiæ \*\* trophæum. Cùm BALDUI-  
NUS miraretur, CALVINUM etiam veteres for-  
mulas stipulationum, sponzionum, Abrenun-  
ciationum in Baptismo sustulisse, ostenderat,  
eas

---

\* Diabolus, seu Calumniator.

\*\* Vaniloquentia.

eas olim fuisse tam usitatas in puerorum Baptismo, ut AUGUSTINUS, cùm non dubitaret legitimas esse, indè potissimum oppugnet Pelagianos. Quid BEZA? Id non negat, quia non potest; sed factum concedens, de jure disputat, & tales stipulationes, quæ in adultis Catechumenis tolerabiles erant, nullâ causâ satîs idoneâ translatas esse ait ad infantium Baptismum: mirumque esse, tantam fuisse Episcoporum negligentiam, ut hunc abusum ferre maluerint, quâm emendare. Hic igitur non cum BALDUINO, sed cum Ecclesiâ veteri litigat; imò verò secum pugnat: nam alibi cum quendam Germaniæ concionatorem magnum vexat, laudat veteres illas formulas. Credis? Credo. Abrenuntias Diabolo? Abrenuntio, & triumphat, non minùs in infantum, quâm Catechumenorum adulorum Baptismo usitatas fuisse. Sic bonus, & ingeniosus Rhetor, ut causæ serviat, modò aliquid laudat, modò reprehendit.

Addit autem, in suæ Ecclesiæ Baptismo retineri etiamnum à quibusdam stipulationes, atque sponsiones, sed aliis formulis, verbisque conceptas. Atqui hoc rursus est, quod in vobis reprehenditur, Theodore, nempe quod, cùm res retineatis, verba tamen mutatis cum aliquâ veteris Ecclesiæ ignominia, & aliorum fraude, qui ex verbis, formulisque novis æstiment res quoque novas esse. Interea tamen

tamen in Castellionem atrocissimè inveheris, qui nihil referre dixit, quo verbo res dicatur, modò res sit eadem. Tu (inquam) tunc contrà contendis, verba Ecclesiæ usitata esse retinenda; & hâc sententiâ litem concludis: Cùm dè re constet, & vocabula longissimo usu trita sint omnibus, unde tandem hoc novandi studium, nisi ex stulto, & ambitiofo ingenio? En rursus, quām bene tibi constes. Si simpliciter ex latinis fecisses Gallicas formulas, ut intellegerentur, translatio fidelis non reprehenderetur: sed nihil cum veteri Ecclesiâ simile, nihil ex eâ reliquum habere voluistis, & Authores potius, quām interpres, ut vestra inventio ab imperitis laudaretur, & esse, & videri in hoc toto genere ambitiosè desideratis.

De Reformatione, quam religiosè desideramus, quid tecum agamus, qui deformitatem nobis placere etiamnum mentiris? Atqui centies jam vobis dictum est; vos impudenterissimè calumniari, cùm, ubi quæstio est de usu Antiquitatis, obtenditis abusum Posteritatis: nihil hîc profectò ad eos, qui non nisi illum tuentur: Nihil itaque ad BALDUINUM, qui minimè omnium defendit, quod est vitiōsum.

De Chrismate denique litigas: sed memineris, quænam de eo tecum lis sit cum BALDUINO. Quæsitum est, an eo veteres Christiani usi sint in Baptismo. Probatum est, usos esse:

esse: & si testimonia, quæ prolata sunt, tibi non sufficiant, adde, quod ipse TERTULLIANUS in Lib. de Baptism. Perungimur (inquit) ex veteri disciplinâ. Quid tu contra nunc objicis? JUSTINUM in suâ ad Antonium Imper. Apologiâ non meminisse hujus unctionis. Credo; sicuti nec reliquarum ceremoniarum, de quibus tunc non quærebatur. Sed alii non minùs & boni, & antiqui testes meminerunt. Ipse TERTULLIANUS in suo Apologetico, etsi de cœnâ Christianorum quæreretur, tamen *αγάπην* \* potius describit; de Mysterio cœnæ nullum verbum: non enim tunc volebat profanis hominibus exponere, quod illi fortasse irrisissent. An propterea dices Cœnam Christianorum nihil aliud fuisse, quam *αγάπην*? Imò ut ex JUSTINO tunc repetis, quod TERTULLIANUS præteriit; cur similiter, ubi de Baptismo quæstio est, non pateris ex TERTULLIANO, & aliis repeti, quod in JUSTINO desideratur?

Confistimus etiamnum in quæstione facti: de hoc ubi constat, si agere velis de jure, contendas, non rectè, ritè, religiosè factum: age cum veteri Ecclesiâ, quam habes adversariam, & ream facis; nos missos facito. Sic etiam cum de Liturgiâ, quam Latini nostri olim Missam vocarunt, quæris, te contineto, & scito, eum, qui res integras tuetur, corruptas non tueri.

---

\* Agapen.

tueri. Quàm velles, vitia ille defenderet, ut, quod declamares, haberet! Sed non impetrabis. Vis, de rebus tantis tecum agi? Patere, ut agatur sedatè, distinctè, liquidò. Rogatus erat Magister tuus, ut, si vellet statum causæ cernere, ad ætatem AMBROSI oculos placidè reflechteret. Tu perinde tumultuaris, ac si in Acherontem præcipitatus essem. Si ad AUGUSTINI Ecclesiam revoceris, fremis nihilominus; & à Papanâ defecisse jam pridem te narras, valde scilicet πρὸς ἔπος \*.

Semel quidem tibi excidit, ipso etiam AUGUSTINO sedente Judice, velle te agere causam tuam. Sed cùm ad rem ventum est, tale Tribunal, tanquam scopulum, fugis. Quid tergiversaris, & terrifica verba fundendo perturbas τὸ κρινόμενον \*\*? Quæritur, an illam, quæ fuit AMBROSI, & AUGUSTINI, & CHRYSOSTOMI sæculo, Ecclesiam (ut utar verbo, quod ferre non potes) Catholicam statuas esse Apostaticam, Satanicam, Antichristianam: aut si modestius, quàm tu loquaris, loquendum sit, an cum eâ communicare, ejus doctrinam sequi, & ceremoniis, formulisque uti liceat. Dic apertè, quid sentias. Non audes, quia, si de eâ confitearis, quod cogitas, deploratam tuam impietatem prodes: siin eam CHRISTI Ecclesiam veram agnoscas, non minùs infandum

---

\* Ad rem.

\*\* Crinomenon, sive Scopum.

rum Apostamat te esse probabis. Quid igitur? Incurris ululans in Papas posteriores, & in eos evomis, quidquid in illam, si auderes, velles. Atqui neque iis, ut Authoribus, acceptum ferre potes, quod est in quæstione, neque de iis, quos despumans perpetuò crepas, fuit instituta disputatio. Cùm de Antiquitate rerum controversarum, deque ejus Antiquitatis Jure quereretur; longè altius ad inquirendam originem causa revocata est. Cur non audes eò nobiscum oculos attollere? De posteritatis abusu postea viderimus; de primo, rectoque usu priùs inter nos constet.

Tu jam, ut statim, & breviter totam (cujus obliuisci non potes) Missam conficias, objicis nescio quam malè subactam massam confusæ, & crudæ maledicentiæ: tu eam, si potes, concoque; atque etiam, si vis, in tuo Sacrificio, profano more, molam falsam \* offer. Quid hæc tandem ad nos? Et qui posset his de rebus seriò, & graviter tecum agi, quādiu sic agis? Et quotmodo tam permixtæ, perturbatæque Satyræ tuæ respondere possemus, cum nihil discernas, nihil distinguas, neque, quam partem potissimum petas, indices? Imò verò quidquid dixerimus, vel astutè miscebis, vel otiosè detorquebis: adeò nulla est ingenuitas tuæ actionis. Dixit fortè BALDUINUS,

non

---

\* vid. HERING de Molendinis quæst. 3. num.  
14. 15. 16. & 17.

non defendere se, si quod in abusū sit vitium! tu exclamas, eum confiteri, in toto usū nihil aut fuisse, aut esse, nisi *βδελυγμα*\*. Adeò religiosè depravas hoc verbum, quo tua potius, neque minùs quàm Barbarorum, profanatio notata fuit.

Urges, ut plura dicamus his de rebus. Atqui tu discere non vis. Et cùm tandem abs BALDUINO hoc requiris, non Episcopo, sed Jurisconsulto? Et cum habeas Liturgica, ab aliis collecta, quid illi aliis studiis occupato molestus es? Sanè si quod ex AMBROSIO, ex AUGUSTINO, ex CHRYSOSTOMO repeterem potes, tibi non sufficit: brevi etiam habebis antiquioris CYRILLI, Hierosolymitani Catecheses, quæ aliquid addent. Iis contenti sumus; si tu contentus non es, adversùs illos agito. BALDUINUM, qui plus præstare non potest, neque longius progreditur, missum facito.

Imò verò valde scilicet opportunè nunc eum provocas, ut etiam tecum agat de Eucharistico Mysterio Corporis, & Sanguinis Domini. Scilicet hic unus in Galliā, Germaniāque supereft, quem aggrediaris tam subtili disputatione. Scilicet in Germania, Galliāque ita te gessisti in ejus rei tractatione, nihil ut supersit, quàm ut hunc oppugnes.

Sed

---

\* Rem execrandam.

Sed si quid haberes, THEODORE, non jam  
dico frontis, quā jam pridem cares; sed sal-  
tem mentis, nunquam profecto renovares  
memoriam hujus certaminis, in quo haec tenus  
tam indignè versatus es. Age, mecum recor-  
dere, quisnam primū in Germaniā fuerit  
triumphus tuus. Tu cùm ELECTOREM  
PALATINUM, OTTHONEM HENRI-  
CUM, qui acerrimè obstabat vestris insidiis,  
primū tentare velles, venisti ad eum, quo  
tempore in thermis erat; & ut ei illuderes,  
magnā cum simulatione novae pietatis, obtu-  
listi Confessionem, quam dicebas non modò  
tuorum Allobrogum, sed & Helvetiorum esse.  
In eā tam tuo, quām eorum nomine profite-  
baris, collectā verborum ἐμφατικωτάτων \*,  
quæ Germanis grata esse putabas, congerie,  
vos in hoc Sacramento credere, verum, &  
reale, & substantiale Corpus, & Sanguinem  
CHRISTI verè, realiter, substantialiter (& quid  
non?) adesse, & sumi, offerrique etiam tam  
indignis, quām dignis. Denique ita loqueba-  
ris, ut ipsum in hoc genere LUTHERUM supe-  
rare videreris. Qui aderant, obstupuerant,  
vos tam repente ex Zwinglianis factos esse  
(sic enim putabant, & loquebantur) plusquam  
Lutheranos. Aderat ipse MARPACHIUS, Ar-  
gentinensis Concionator, qui quia vestras  
Strophas magis noverat, suspicabatur, dolum  
aliquem.

---

\* Maximam vim significandi habentium.

aliquem subtilem subesse. Sed noluerunt viri boni morosius inquirere, an, sicuti loquebamini, ita sentiretis.

Amplectuntur ergo tuam illam Confessionem, deque eâ triumphant, & CHRISTO gratias agunt: &, communis gratulationis ergò, mittunt eam DUCI WIRTEMBERGENSI: Hic vestram conversionem non minùs admiratus est, laudavitque. Cùm autem audirent Tigurini, propterea de se in Germaniâ triumphari, noluerunt tuam imposturam tolerare. Itaque non modò agnoverunt Confessionem, quam eorum quoque nomine obtuleras; sed & acerrimè oppugnârunt: téque, qui eorum mandatum clementitus eras, non modò falsum peragunt, sed & παραπρεσβειας \*. Tu quidem, ut eos placares, scilicet allegabas, dolum aliquando bonum esse, aliud agere, & aliud simulare. Sed illi nondum hanc Artem vestram didicerant. Ergo cum iis aliter reconciliari non potuisti, quàm Confessione tui peccati, & (quæ tibi ignominiosa profectò fuit) Exomologesi. Hæc prima fuit in hoc mysterio tractando Religio, Fidésque tua.

Paulò pòst domum reversus, ut magis ostenderes te antea Germanis illusisse, JOACHIMUM, Hamburgensem Concionatorem, quem omnes (ut vocant) Saxonicae Ecclesiæ, & sexcenti

---

\* Legationis male obitæ.

centi earum Ministri, quos CALVINUS Judices appellārat, acerrimè defendebant in hāc quæstione, tu (ut CALVINO succenturieris, apertè oppugnas, & palam profiteris, aliam in Cænâ Domini non esse Corporis, & Sanguinis Domini communicationem, quàm in Baptismo, in Concione, in Lectione S. Scripturæ, & deinde in privatâ meditatione, quoties mens fidelis in Christum assurgit. Nunquam non modò CALVINUS, sed ne ZWINGLIUS quidem tam vulgariter de hoc Mysterio locutus est. Sed tu tuam audaciam vis eminere.

Paulò pòst Tillmannus HESSHUSIUS, quo tempore PALATINI Concionator erat, scripsit adversùs CALVINUM hāc de re libellum. Tu, qui nominatus tamen non eras, mox insurgis, & scurrilibus Dialogis eum proscindis. Quadruplex erat libelli tui inscriptio: ΚρεωΦαγία \*, Cyclops, Onos \*\*, Sophista. Metuebas enim, ne non statim omnes intelligerent, quàm religiosè ageres de hoc Mysterio. Ibi ergo non modò inauditâ scurrilitate nescio quem asinum molitoris, Apuleano Ludo, fustibus cædis; sed & quasi apud Anthropophagos Canibales educatus es, despumans crepas Sarcophagos, Cyclopes, Polyphemos: sic enim in uno ignominiosè depingere volebas Germanos Concionatores. Et cùm sci-

O 2

res,

\* Manducatio carnis.

\*\* Asinus.

res, Ethnicos de hoc Christianorum Myste-  
rio tam profanè locutos esse, voluisti simili  
exemplo Cænas Thyestæas configere. TILL-  
MANNUM non perculit Cyclopica hæc tua ru-  
etatio: imò verò sic ille tibi respondit, &  
tuam angelicam simplicitatem ita depinxit, ut  
tu ipse attonitus deinceps tacere malueris.

Sed & quia subinde fingebas saltem, Wi-  
tembergam, & Lipsiam (quas vocabas Ocu-  
los Saxonie) minùs vobis adversari, Lipsia  
edidit Martini KEMNITII, Brunswicensis Mini-  
stri, Librum, qui placidè, sinè ullis convitiis,  
& sinè ullà verborum acerbitate vos oppug-  
naret. Deinde Paulus EBERUS (qui fuit veluti  
anima PHILLIPPI, Pastor Wittebergensis) acer-  
bius in CALVINUM scripsit. Cur his præteri-  
tis, quibus respondere nondum potuisti, alios  
laceffitis?

Sed tu scilicet in Galliâ occupatus fuisti in  
eâdem quæstione pertractandâ. Rectè: Vi-  
deamus, an hic melius te gesseris. Venisti  
ad Conventum Posiacum, ut audireris. Regi  
pollicitus es, te nihil dicturum, quod hujus  
Mysterii dignitatem minueret, aut perturba-  
ret Auditores. Hâc conditione data est tibi  
audientia. Tum verò exclamâsti, tam dista-  
re Corpus CHRISTI ab Eucharistiâ, quâm Cæ-  
lum à terrâ. Multis frementibus, quorum si-  
bilus te propè exanimatum repente perculit,  
quidam ex tuis quondam Sodalibus subridens  
infu-

insusurravit: An crederet, in Eucharistiâ esse CHRISTI Corpus, qui vix in Cælo credit ullum esse Deum? Princeps Cardinalis cùm, ut tibi responderet, mandatum accepisset, multa de re Sacmentariâ dixit, quæ ad te refellendum pertinere putabat.

Aliquot pòst diebus in collatione rogaris, ecquid velis; ac, ne rursus fingeres, vos cum Protestantibus convenire, prolatum est, quod ex Germaniâ missum erat, recens scriptum, quod talem larvam vobis detraheret.

Petiisti tempus ad deliberandum. Data est tibi, ut commodiùs deliberares, brevissima formula, ut ex tempore tunc conscripta fuit abs illo Cardinali. Aliquot pòst diebus privatim exhibes, quam cum tuo Saulo, ex Angliâ adducto, confignare paratus sis, formulam, quæ proximè (ut videbatur) accedebat ad alteram, & ab Episcopis ipsis tolerari posse, videbatur: adeò liberaliter ingeminabat hæc, verè realiter, substantialiter esse Corpus CHRISTI in Eucharistiâ. Reditur die condicto ad Collationem, ut de formulâ utrâque agatur. Tum verò ex scripto (nam memoriam conscientia mala perturbabat) recitas longè aliam Protestationem, atque adeò depreciationem, ne in hanc disputationem descendere cogāris; adjicisque, malle te, hâc de re audiri veterum Ecclesiæ Doctorum orationem, quam tuam.

O 3

Et

Et interea, ut terreas Auditorium, quod erat amplissimum, atque nobilissimum, impudentissimè jactas, te in eo stare nomine Helvetiorum, Germanorum, Polonorum &c.; quamvis non nescires, in eo ipso conventu recitatas esse literas, ex Germaniâ missas, quæ te refellerent; & præsens ex alterâ parte adesset PETRUS MARTYR, tuus Assessor, qui palam tibi reclamabat, cùm simpliciter defendebat Tigurinorum dogma. Denique exspectare te dicebas, ut erudiaris ex sententiâ Ecclesiasticorum Doctorum, qui floruerunt usque ad sexcentesimum Christi annum. Allata erant volumina plusquam quinquaginta, & notati in iis loci, ut quærendi labor abesset. Sed longè aliud quærere te apparuit, cùm astutâ recriminatione usus, Auditorium traduxisti ad aliam altercationem, tametsi, cùm id ironicè ageres, imprudens incurris in eum, qui te ita exceptit, ut pedem referres. Certè tunc eum præsentem tam reverenter deinde es allocutus, quām nunc absentem petulanter proscindis: & quidem magnâ simulatione novæ modestiæ, obstipo capite, demissis auriculis, oculis in terram defixis, tremulâ voce protestatus es, nolle te perturbare Concordata inter Papam, & Regem &c.

Redeo ad tuam disputationem Sacramentaliam, quam tu rursus postea aggressus, ecquid in alterâ magis privatâ collatione miscueris, liquet

liquet ex epistolâ ejus Theologi magni, qui te potissimûm exercebat: quæ epistola edita est, ut etiam refelleret falsitatem Actorum, à vestris editorum. Quid enim agitis bonâ fide? Prætereo reliquos tuos ludos, variasque strophas, & antistrophas: Sed quis non exhorrescat tragicam catastrophen, cùm tandem effecisti, ut tua illa Cœna esset Cœna Lapitharum. Ergo nunc triumphans, & quasi rebus hactenus præclarè gestis, provocas BALDUINUM ad hoc certamen: & quia obiter scripsit, se se tale, tantumque Mysterium non exinanire; magni autem facere perpetuam veteris Ecclesiæ sententiam, exclamas, eum jam transiisse ad Vetusias. Nescio, an tali verbo veteres Orthodoxos irridens notare velis, ut olim eos Ariani vocabant Humusianos. Sed profectò si vel cum hoc uno Jurisconsulto tibi res esset, neque major victoria, neque offensio minor esset tua, quam hactenus fuit, cùm es congressus cum Theologis: & fortasse audires aliquid, quod acrius retunderet hanc tuam effrænatam sive proterviam, sive procacitatem; neque non aliquando dies fortassis veniet, quo & hanc plagam accipies.

Interea hoc tibi quoque reípondemus, cùm BALDUINUM lacefisis, & provocas ad disputationem περὶ ἀνάγνωσης, sive de Prædestinatione; in quâ quæstione sudabis, ut nobis exponas, quænam fuerit olim illa Prædestinaturum Hæ-

resis, quam fuisse tempore HONORII IMP. narrat SIGEBERTUS, Gallus Historicus bonæ fidei: & laborabis, ut explices tuam dictionem, quâ ad eludendum uteris, scribens, DEUM quidem velle, & facere omnia, quæ fiunt, non tamen ita, ut fiunt: Atqui, eo invito ita fieri, dicere nolles; & permittentis verbum repudias. Interrea nihil quidquam impudentius dici, aut fingi potest, quâm quod jam contendis, hâc totâ in re PHILIPPUM idem, quod vos, & vos idem, quod PHILIPPUS, sentire. Nam, et si non nisi postremis ejus libris, & sententiis standum esse dicas, tamen quod postremò ad Articulos Bavaricos scripsit, an cum doctrinâ in hoc genere vestrâ planè consentit? Quid de hâc quæstione obiter annotârit BALDWINUS ad MINUTIUM, non ignoras: nunc nihil addit; sed cùm sciret, vos disputando nihil aliud efficere velle, quâm olim Ariani; non temerè nuper vobis opposuit illam veterum Christianorum Principum Legem, quæ curiosas, audaces, infinitas, publicas privatorum hominum de Mysteriis disputationes, & de talibus rebus, rectè judicatis, novas, atque irreligiosas contentiones, ex quibus tandem malorum redundavit, inhibet. BEZA natus scilicet ad disputandum non minus, quâm ad bellandum, propterea exclamat, illum jam ad eos transiisse, qui Christianam Religionem transformârunt in Cæsarîs Mysteria. Atqui lex illa est non modò THEODOSII, atque MARTIANI, sed & Concilii Calchodonensis, & quidem

dem sanctissimis causis, & justissimis rationibus communia, quas & magis, atque magis posteriorum temporum exitus comprobavit.

Adderem, quod non modo NAZIANZENUS, sed ipse imprimis AUGUSTINUS scribit *Epist. CXI. CXXI.*, & in *Enchirid. Cap. IX.* & *Lib. II. de Peccat. Remiss. C. ult.* & *Lib. II. de Civ. Dei C. I.* Sed mox insurget Eleusinus noster Sacerdos, & talia dici singet de suis initiis, quibus, propè est, ut comparet Religionem Christianam. En, cum quo Mystagogi nobis futura res sit, si cum isto Diagoro sit certandum. Quid plures horas perderem in hoc tam lubrico serpente comprimendo? Etsi deprehensus teneatur, arctissimèque constringatur, tamen sibi labit, ac sinuosos Gyros implicans, se se evolvet, ut elabatur; & simul incantando probabit, nos ipsos teneri, & quidquid tandem dixerimus, non solùm eludet, sed etiam avertet.

Nam & mirabilis est ejus (ut dixi) πειθω\*: Docuit Lausanae multis annis Rheticam, conjunctam cum Poësi Græcorum. Etsi illinc turpiter, atque ignominiosè pulsus fit, quia scilicet suorum Bernensium mores, quos tot annis pertulerat, per suam conscientiam ferre non potuit; tamen factus propterea Præco Genevensium, illam Versutiæ scientiam callebat, & exercet magis, quam unquam. DEUS male perdat artem perditissimorum Sophistarum.

O 5

Nun-

---

\* Vis persuadendi.

Nunquam antea satís intellexeram, quod de cā PLATO scripsit. Audieram puer aliquando illud in scholā ex comœdiā: Nihil tam bene dici potest, quin, malè interpretando, possit depravarier. At nunc nobis res est cum depravatissimo Interprete, & maledicentissimo Calumniatore, qui nullum non verbum miro artificio capitat, ut corrumpat. Quot in ejus invectivā declamatione Periodi sunt, tot sunt exempla, & figuræ hujus artis. Et nondum confitebitur, se se ex Theologiā non modò efficere Technologiem \*, ut ille olim AETIUS, Hæresiarcha, sed etiam malitiosam Matæologiam \*\*.

Cùm BALDUINUS videret, tanto hos fastu inflatos cristas cum supercilio attollere propter gloriam suarum scriptionum, admonuit CALVINUM , nihil esse, cur de suo ingenio tanto-pere glorietur , aliisque tam superbè insultet, cùm nihil fecerit ingeniosius, quàm quod Commentarios BUCERI , & OECOLAMPADII interpolârit. THEODORUS propterea exclamat, injuriam fieri Deo, & Apostolis, quia non iis, sed novis hominibus acceptò feratur Doctrina Religionis ; & interea adversarium confiteri, non modò Helvetiam , sed Germaniam totam subscribere doctrinæ Calvinianæ. Et quisquam negabit, admirabilem dialecticum esse BEZAM?

Et

---

\* Artem decipiendi.

\*\* Vaniloquentiam.

Et miramur interea, si BALDUINUS, ne diutiūs cum ingeniis conflictetur, ejusmodi facere malit, quod eum postremō mones, THEODORE. Mones, ut spartam, quam natus est, exornet potius, quam cum hominibus tam, ut ais, rixosis, & seditiosis, hoc est, ut ipsemet interpres, vobiscum frustra contendat. Itaque per BALDUINUM licet, ut in istā Palæstrā, tanquam Dares, solus gloriōsē te, & brachia tua ostentes: nam & dum furiosē declamas, & mentiendo te fatigas, placidē ille in bonā conscientiā acquiescit, & ad Deum conversus, illud ex Psalmo ingeminat: *Illi maledicent, tu autem, Domine, benedices* \*

Age ergo, discursa, tumultuare, vociferare; & flectere si nequeas Superos, Acheronta moveto: ille quietus expectabit, ut, quod ais, piis, & doctis Scriptoribus, qui tuorum Actorum historiam colligunt, novum argumentum præbeas ad eam quoque historiam locupletandam, quam de horrendis DEI Judiciis conscribunt. Non enim dubitamus, quin in te aliquando Deus editurus sit terribile exemplum suæ ultionis, quo totus Orbis attonitus erudiatur. Interea nihil est, quod tibi non liceat. Fruere usurā modici temporis; ac, si infamis, & familiaris, nescio quis, tuus morbus nondū tuum planè fregerit latus; & raucedo nondū faucibus occupatis vocem inter-

---

\* Ps. 108. v. 28.

interceperit tuam, declama, quantum voles, valesque, & potes, præsertim in Apostatas, qui nullâ de re magis sibi gratulantur, quâm quod tuam factiōnem, opprobrium Nominis Christiani tempestivè fugerint.

Exclamas : Etiamsi quibusvis Judæis, vel Paganis deteriores essemus, & tam crudeles, immanesque essemus, quâm tu esse vis; an tu Apostata esse desines ? Sed si, qui propterea à vobis deficit, est Apostata ; quid supereft, quâm ut omnes intelligent, vos etiam hoc nomine incessere illam ἀποστασίαν ἀπὸ τῷ Νέρωνος\*, cuius meminit PLUTARCHVS, & ipse in alterâ suâ Responsione BALDUINUS ? Ergo quamdiu ita agis, nihil aliud efficies apud homines cordatos, quâm quòd insanabilem iis morbum animi tui magis, atque magis patefacias, ut, si minùs quidam hactenus te noverint, jam videant esse te, qui es. Quanquam ita jam tu te ipsum omnibus prodideris, ut pauciores deinceps decepturus sis. Itaque & quotidie hic audimus primarios Galliæ Nobiles, qui te aliquando, cùm non nossent, fortasse secuti sunt, nunc detestari tuos impurissimos mores, ingenium turbulentum, ambitionem irrequietam, sanguinariam crudelitatem, insanam mal-dicentiam, arrogantiam intolerabilem, versutiam incredibilem, & nocendi cupidatatem insatiabilem. Ergo valde erras, cùm eos, quibus ali-

---

\* Defectionem à Nerone.

aliquando fortè imposuisti, nimium hebetes etiamnum, & cæcos esse existimans, jactas, Patronos, & Defensores, & Mecænates esse tuos. Spero equidem brevi, fore, ut & ipse sentias, eos potius esse severissimos Judices, atque ultores tuæ improbitatis. Non desinent & optare, & amare res bonas; ut, qui abs te discesserunt, eas & amant, & optant magis, atque magis: Sed cum sub earum umbrâ. & inani titulo nequitiam tuam, & fraudem celare vis, scito, diutius id passuros non esse viros bonos, qui te nôrunt.

Itaque etsi credulam aliquam multitudinem, alias ob causas fortasse irritatam, atque offensam infatuaveris, multosque vesanos incantaris; tamen ubi ad se redierint, qui ad te præcipiti quâdam vertigine, & vanitate, adacti transierunt, senties, quâm eos pudebit suæ levitatis, atque cæcitatis. Nunc cum iis illudendo verba dare impune potes, per nos quidem certè licet, ut coaxes, crocites, grunnias, mugias, hinnias, gannias, barrias, rudas, fremas, frendeas, latres, ulules, &, quascunque voles, belluas tuo rictu, & gutture superes. Nos contenti nunc erimus eâ responsione, quam primæ pagellæ caninæ tuæ declamationis præfixisti, ut Magistri tui, tanquam Phonasci nostri, proœmiis nostram infantiam adjuvares, & alio comparandæ responsionis labore sublevares.

Neque

Néque verò miramur, te poëticas Metamorphoseon fabulas, quibus cerebrum tuum tua Circe referis, suggestisse Magistro Reformationis. Sed incautè fecisti, quòd, qualis vestra non Reformatio, sed Transformatio sit, per imprudentem tuum *ὑποφήτην* \* statim indicari non senseris, dictantem non tibi, sed nobis, quod responderemus. Hecubam (inquit ille) fingeant Poëtæ, cùm, Trojâ eversâ, passim maledicta, in hostes ingerendo intemperanter dolori indulgeret, tandem fuisse incanem conversam, nempe quòd immodicus ille convitiandi impetus nihilo pluris quam canis rictus fieret. Si hoc de nobissimâ Reginâ dictum fuit, quam si tot, tamque acerbæ clades in rabiem adigerent, aliquà tamen excusatione dignus erat muliebris luctus: Quid de homine nihili dicendum, qui cæco magis furore, quam iracundiâ percitus, non tantum in obvios quosque probra temerè conficta evomit; sed optimos cupidè appetit, quibus protervè maledicat? Sic nos tibi respondere, credo, voluisti pro tuo candidato candore, THEODORE: & talia sunt pleraque vestra, ut à nobis non in alios, sed in vos ipsos scripta, & nobis in vos dictata esse videantur: quod Divini Judicii genus in Donatistis olim etiam OPTATUS, & AUGUSTINUS agnoverunt. Itaque retortis in vos vestris convitiis nihil aliud addam;

---

\* Musarum Internuntium.

addam, quām quod AUGUSTINUS ad Parmenia-  
num, Donatistam: Quæ (inquit) tandem vīs,  
nisi cæcitas, & vanitas animi, cogit hominem,  
clausis (ut dicitur) oculis, in aliū jacere, quod  
in eum, qui jecerit, continuò redeat, eumque īctu  
reciproco affligat, intacto illo? Sic ille.

Nunc cogita (si per tuam efferatam maniam  
potes, THEODORE) quid dicere possimus, cùm  
ipse, ipse BUCERUS (cujus dicta pro Oraculis ha-  
bes) CALVINUM jam olim appellavit non modò  
canem, sed etiam rapidum canem, idque ipsius  
CALVINI manu confignatum etiamnum tenea-  
mus? Quid ille vester nunc diceret, si, in  
quam postremò rabiem degenerastis, hodie  
videret? Delectat nihilominus vos vestra ca-  
nina facundia. Sed quoties ingeminas istud:  
Quid latras? saltem cogita verus responsum:  
Quia furem video. Atque utinam, ô Cer-  
bere! plures essent canes, qui suo latratu ve-  
stra sacrilegia terrorerent!

Ais, eum, quem impetis, & proscindis,  
latrare posse, mordere non posse. Cur igitur  
tu tam mordax, & aculeate, & dendale Satyri-  
ce, hominem tam edentulum, & obtusum, &  
imbellem reformidare videris? Vel cur Cer-  
beræus Molossus agnum bidentem, & mutum,  
vel oviculam balantem procul laceffere digna-  
tur? Cur non potius provocas, & excitas,  
& irritas quosdam nimium tibi blandos Meli-  
tæos; quid apud JESAIAM dicuntur canes muti?

An

An quia horum silentio beatus es? An quia foves Cynalopecas \*? Neque tamen temerè infelicis Hecubæ meministi, quæ, quia Polymnestoris, sicarii, tyrannidem, ut potuit, ulta est, lapidibus, indignè obruta est. Vos nempe ululatum miserorum, vestram immanitatem deplorantium, simili feritate comprimere velletis; sed qui non modò canes, sed etiam tigres vocare alios soletis, videte, ne domi alatis catulos, quales ex tigre, & cane, tertio coitu nasci ajunt.

Ceterum, mirifice Poëta, cùm tuas Metamorphoses revolveres, cur illius pueri, qui in stellionem; vel Cerambi, qui in Scarabæum; vel Ascalaphi, qui in bubonem, vel Lyciorum, qui in ranas, memoriam tuam Circem non recreasti, ut vestram Transformationem lubentius perpoliret? Cur non saltem illius vestri Lycaonis, Arcadis, qui cum puerum immolasset, & humanum cruentum sparsisset, mox in lupum conversus esse dicitur? Deus Bone! ad quæ monstra descendendum est, cum istis renatis Angelis est respondendum? Sed quid aliud audire debent, qui homines, humanos, ingenuos, literatos, Christianos ex suo ingenio ferino æstiment, & pro Cynocephalis \*\* habent? Cum humanissimè, & modestissimè responsum iis fuit, clamant, caninum esse latratum: Ut & nunc, THEODORE, Crocodillum tuum, flebiliter

---

\* Canivulpes.

\*\* Hominibus canini capitū.

biliter scilicet ejulantem, sibi responsum esse paulò acerbiùs, quām putabat, initio proponis; quasi tam aridas, minacésque lacrymas extra vestra Poniōria irrideri nescias; & interea ex illius rursus dictatis posse repeti, quod iterum audiat. Meministi, quid in hominem, multò, quām sit ille, vel tu ipse sis, Evangelii vocaliorem Præconem scripserit: hoc illud est, quod nunc querulus convitiator meliori jure debet resorbere, ut vestris demum vos verbis constringi denuo sentiatis. *Quasi verò* (inquit) qui oīnia humanitatis jura evertit, & datā operā visus est æquitati, & modestiæ bellum indicere, sibi non præciderit omnem expostulandi rationem. Cur non potius attendit ad cœlestis Magistri sententiam: *Quā mensurā usi fueritis erga alios, eadem rependetur vobis?* Ac si toto vi-tæ cursu nihil, præter anathemata, didicerit, singulis propè versibus in nos fulminat; & cùm eum deficiant rationes, clamando, & convitian-do optimam causam obruit. Indò, sicuti in Co-mædiis servos nequam ad omnia turbanda impellit desperatio; ita hic suis clamoribus, lucem tenebris permiscet. Hanc ego insaniām cur non suo no-mine notarem? Indò quia cum duro, & præfra-eto capite negotium erat, cur non liceret malum nodum duro cuneo retundere? Nisi fortè novo quopiam privilegio sacrosanctum se esse demon-straret, ut protervè omnibus maledicendo, verbum asperum non audiat. Hæc scilicet causa est, cur ambo isti Censores Librum meum esse spinosum,

&amp;

P

¶ virulentum pronuntient sc. Ego verò tam  
indigne laesus, non iracundiæ fervore, sicuti fal-  
sò existimat, sed cohendæ ferociæ, quâ nimium  
exultabat, studio acrius paulò, quā optarem,  
remedium adhibui. Atque utinam dolore puncus  
fuisse ad pænitentiam! Sed quando tantum exa-  
cerbatus, nihil de pervicaciâ remisit; imò in eâ  
magis, ac magis obduruit, altero fructu me con-  
solor, quod alii intelligent, quā insipide errori  
suo contra claram lucem patrocinatus fuerit. In-  
terim si animum meum ipse, odio excæcatus, per-  
spicere non potest; Christus tamen communis Ju-  
dex agnoscat, ¶ suo tempore palam faciet, non  
ita privatis injuriis ulciscendis esse me addictum,  
quin, depositâ mox omni earum memoria, si qua  
spes sanandi hominis appareat, paratus sim omnes  
fraternæ pacificationis modos tentare. Hoc repu-  
dians, violento scripto, ne dicam Cyclopicō, non  
modò Cælum terræ miscere, sed Acheronta mo-  
veve conatus est. Hic ego tam præfraetam homi-  
nis intemperiem mediocribus remediis non posse  
mitigari existimans, stylum acuere mihi permisi:  
quid enim facerem? Quia vel silentio prodenda  
fuissest alioqui veritas: vel placidâ, mollique actione  
dandum timiditatis, ac diffidentiæ signum. Nam  
quasi ex Dei manibus extorsisset omnia fulmina,  
quæ formidabili modo in capita nostra torqueret,  
verborum crepitū mentes omnium percellere tenta-  
vit. Quia gravior refutatio ridiculos anathema-  
tum ejus terrores discussit; quidquid petulantiae, vel  
furoris in nos vernuit, delicias esse fingens, me omnis  
huma-

humanitatis, & modestiae oblitum esse causatur. Ergo cum intractabilis fuerit ejus ferocia, quam tota ejus declamatio frivola sit, & puerilis, facile appareat. Perinde enim ac si Leones, & Ursi, dum rabiosè obvium quemque impetunt, causentur, se non mulceri: ita delicatus hic homo, plusquam atrociter alios proscindens, non agi fraternè secum magni criminis loco censem.

Non possunt, patientissime THEODORE, haec te responsa offendere: non enim nostra sunt, sed Magistri tui verba, nobis jam veluti prae-euntis in concipiendâ exceptione. Malè autem in eum esse retorta, qui negare potes? Credo equidem jam te & satiatum, & fatigatum esse non minùs, quam me, cum refello maledicam futilitatem, quam miseros Lectores obtundis. Quid igitur supereft? Tu subinde BALDUINUM laceffens, occinis illud tuum: *Dic de tribus capillis.* Sed hoc illud est, quod tibi occini jam pridem cupio: ut de re, primùm propositâ, ex quâ percipi aliquid utilitatis possit, dicas, hoc est, de scripturâ, deque Traditione: hæc enim sunt capita, in quibus prima contestatio versata est.

Ergo relinque tua diverticula fugitiva, & tandem aliquando ad principalem quæstionem, quæ hujus contentionis origo fuit, redi; ut de re aliquâ magnâ seriò, & sedatè quæratur Enne diutius tergiverseris, ad te refertur ipsius GEORGII libellus cum suâ defensione, si fortasse felicius ex hâc disputatione eluctari potes,

quām Herus, cliēnsque tuus. Transigito ergo  
cum GEORGIO, priusquam BALDUINUM impe-  
tas, ut hæc lis justo ordine peragatur: & cùm  
jam duobus annis meditari potueris, quod di-  
ceres; tandem aliquando effundito, quod col-  
ligere interea potuisti; eā tamen conditione,  
ut, si rursus nebulas tantūm offendas, exspe-  
ctes acriorem refutationem. Meminimus, te  
ante biennium in Aulā coram Principibus,  
magnā simulatione gravitatis, quædam miscui-  
se de illis tribus capitibus, quo tempore allat-  
tus ex Germaniā fuit ille libellus GEORGII; sed  
si præterea nihil habes, quod dicas, nihil egisti.  
Vexabat eodem tempore eundem libellum ca-  
lumniosā castigatione Magister tuus, ex cuius  
dictatis repetebas, quod eādem de re garriendo  
jactabas. Ergo quod redditum illi responsum  
nunc leges, tibi responsum esse scito; aliquando  
ut te pudeat, nihil hactenus replicare te potuiss-  
te. Ad convitia tua responcionem, quam jam  
legisti, quia diutius tibi debere non potuimus,  
paucis, postquam huc permanavit tuus in BAL-  
DUINUM effusus furor, diebus statim redditam  
tibi esse scito cum reliquo munere, quod ad te  
mitto, ut rursus non exspectes nundinas, si  
quod habes, quod venditare velis. Interea  
vale, si potes, Vir optime.

*Ex Urbe Parisiorum Cal. Novemb. MDLXIII.*

